

67



ГЭМТЭЛ, СОГОГ СУДЛАЛЫН ҮНДЭСНИЙ ТӨВИЙН ЕРӨНХИЙ ЗАХИРЛЫН ТУШААЛ

2022 оны 05 сарын 09 өдөр

Дугаар А/83

Улаанбаатар хот

Дотоод хяналтын камер ажиллуулах журам

Хүний хувийн мэдээлэл хамгаалах тухай хуулийн 27 дугаар зүйл, Байгууллагын нууцын тухай хуулийн 3 дугаар зүйлийн 3.2, 5 дугаар зүйлийн 5.2 мөн хуулийн 7 дугаар зүйлийн 7.2 дахь заалт, Байгууллагын хөдөлмөрийн дотоод журмын 3.2.1 дэх заалт, мөн журмын 5.5.2 дахь заалтыг тус тус үндэслэн ТУШААХ нь:

1. Тус төвийн ажлын байранд хувь хүний болон мэдээллийн аюулгүй байдлыг хамгаалах, байгууллагын эд хөрөнгийн бүрэн бүтэн байдлыг хангах зорилгоор эмнэлгийн хэмжээнд “Хяналтын камер ажиллуулах журам”-ыг нэгдүгээр, камерын үйл ажиллагаатай холбоотой хөтлөх маягтуудыг хоёрдугаар хавсралтаар тус тус баталсугай.

2. Энэхүү тушаалыг удирдлага зохион байгуулалтаар ханган ажиллахыг Эрдэм шинжилгээ, иноваци хариуцсан дэд захирал (Б.Батзориг), Эмнэлгийн тусламж үйлчилгээ хариуцсан дэд захирал (Р.Гантуяа), тушаалын хэрэгжилтэд хяналт тавьж ажиллахыг Эмнэлгийн тусламж үйлчилгээний чанар, аюулгүй байдлын алба (Б.Бат-Оргил) нарт үүрэг болгосугай.

3. Эмнэлгийн хэмжээний камер хяналтын системийн нууцлал аюулгүй байдал, хэвийн үйл ажиллагааг тасралтгүй хангах ажлыг холбогдох хууль, журмыг мөрдөн ажиллах, хяналтын камерын байрлах цэгүүдийг батлуулахыг Мэдээлэл технологийн алба (Э.Батдорж)-д үүрэг болгосугай.

4. Тушаалын хэрэгжилтэд шаардлагатай төсвийг батлагдсан төсвийн хүрээнд гаргахыг Санхүү бүртгэлийн алба (Ц.Энхбаярт)-д зөвшөөрсүгэй.

ЕРӨНХИЙ ЗАХИРАЛ



Э.ГАЛБАДРАХ

ХЯНАЛТЫН КАМЕР АЖИЛЛУУЛАХ ЖУРАМ

НЭГ. ЗОРИЛГО, НИЙТЛЭГ ҮНДЭСЛЭЛ

- 1.1. Эмнэлэгийн үйл ажиллагаанд хувь хүний болон мэдээллийн аюулгүй байдлыг хамгаалах, байгууллагын эд хөрөнгийн бүрэн бүтэн байдлыг хангахад энэхүү журмын зорилго оршино.
- 1.2. Эмнэлгийн орчинд зохион байгуулагдаж буй дараах үйл ажиллагааг хяналтын камер /цаашид камер гэх/-ыг ашиглаж хяналт тавихтай холбоотой харилцааг зохицуулна.
Үүнд:
 - 1.2.1. Эмнэлгийн нийтийн эзэмшил, ажлын байранд эмнэлэгийн ажилчдын аюулгүй байдлын хангах;
 - 1.2.2. Системийн тасралтгүй, найдвартай ажиллагааг хангах зорилгын хүрээнд аливаа санаатай болон санамсаргүй үйлдсэн гэмт хэрэг, халдлага, хорлон сүйтгэх болон хууль бус үйлдлээс урьдчилан сэргийлэх, таслан зогсоох, шаардлагатай арга хэмжээ авахтай холбоотойгоор үүсэх харилцааг зохицуулах;
 - 1.2.3. Эмнэлгийн барилга байгууламж, тоног төхөөрөмжийн бүрэн бүтэн байдлыг хамгаалах;

ХОЁР. ХЯНАЛТЫН ТӨХӨӨРӨМЖИЙН ТӨРӨЛ

- 2.1. Камер нь энэхүү журмын 4 дүгээр зүйлд заасан нэр төрөл техникийн үзүүлэлтийг хангасан байна.
- 2.2. Хяналтын төхөөрөмж нь журамд заасан нэр төрлөөр хязгаарлагдахгүй ба журмын үндсэн зорилгыг хангах зорилтын хүрээнд техникийн дэвшилтэт бусад арга хэрэгслийг ашигласан бүх төрлийн төхөөрөмж байж болох бөгөөд ашиглалтын стандартад нийцсэн байна.
- 2.3. Эмнэлэг нь зориулалтаас хамааран дараах камеруудыг ашиглаж болно. Үүнд:
 - 2.3.1. Гадна хяналтын камер: Хяналтын орчны дүрсийг харах зориулалттай, байгууламж болон тусгайлан зориулсан шон дээр суурьлуулсан чиглэлийн камер
 - 2.3.2. Дотор хяналтын камер: Дотоод орчныг хянах зорилгоор ашиглах камер
 - 2.3.3. Хөдөлгөөнт камер: Хөндлөн болон хэвтээ чиглэлд хөдөлж, дурангийн тусламжтайгаар дүрсийг татаж, томруулах зориулалт бүхий камер
 - 2.3.4. Тусгай зориулалтын камер: тээврийн хэрэгслийн улсын дугаар таних, бүртгэх, бүртгэх, дулаан мэдрэгч, зэвэрдэггүй, ус чийгний хамгаалалттай камер

ГУРАВ. КАМЕР ХЯНАЛТЫН ТӨХӨӨРӨМЖИЙН АШИГЛАЛТ ҮЙЛЧИЛГЭЭ

- 3.1. Эмнэлгийн хэмжээний камер хяналтын төхөөрөмжийн ашиглалт үйлчилгээг Мэдээлэл технологийн алба /МТА/ хариуцна.
- 3.2. Хяналтын төхөөрөмжүүдэд жилд 2-оос доошгүй удаа техникийн үзлэг, үйлчилгээ хийх ба цэвэрлэгээг шаардлагатай тохиолдол бүрт хийнэ.
- 3.3. Хяналтын камер хариуцсан инженер нь сар бүрийн эхний долоо хоногт хяналтын камер болон бичигч төхөөрөмжийн хэвийн ажиллагааг шалган тэмдэглэл хөтөлнө.
- 3.4. Эвдрэл гэмтэл гарсан тохиолдолд гэмтлийн шалтгааныг яаралтай хугацаанд тодорхойлон боломжит гэмтлийг 24 цагийн дотор засварлана. Шинээр сэлбэг

- хэрэгсэл авах эсвэл бүтнээр нь шинэчлэх шаардлагатай бол яаралтай журмаар шийдвэрлүүлнэ.
- 3.5. Камер хяналтын төхөөрөмжийг шинэчлэх болон урсгал засварын зардлыг жил бүрийн төсөвт тусган оруулж шийдвэрлүүлнэ.
- 3.6. Эвдрэлийн түвшнээс хамааран засвар үйлчилгээг мэргэжлийн байгууллагаар гүйцэтгүүлж болно.
- 3.7. МТА нь камер хяналтын төхөөрөмжийн 24 цагийн тасралтгүй, найдвартай, хэвийн ажиллагааг хариуцах чиг үүргийг хэрэгжүүлэх зорилгоор техникийн тодорхойлолт, зааварчилгааг холбогдох нийлүүлэгчээс авсан байх бөгөөд шаардлагатай засвар үйлчилгээ, програм хангамжийн хөгжүүлэлтийг баталгаат хугацаанд нь нийлүүлэгч байгууллагаар гүйцэтгүүлэх ба баталгаат хугацаа дууссан тохиолдолд МТА-ны сүлжээний инженер гүйцэтгэн ажиллана.

ДӨРӨВ. ТЕХНИК ҮЗҮҮЛЭЛТ, СУУРЬЛУУЛАЛТ, АЮУЛГҮЙ БАЙДАЛ

4. Хяналтын камерын систем, хяналт, видео аналитикийн шийдэл нь дараах шаардлагыг хангасан байна.
- 4.1.1. Хяналтын камерын үзүүлэлт:
- 4.1.1.1. Камер нь тоон технологи дээр суурилсан IP камер байна;
- 4.1.1.2. Дүрсний нягтаршил: Дотор орчинд 2 мигапиксел /1980x1080 25 frame/sec/-ээс багагүй, гадна орчинд 4 мигапиксел /2560x1600 frame/sec/-ээс багагүй;
- 4.1.1.3. Дүрс хувиргаж дамжуулах шахалтын горим нь H.265+ болон түүнээс дээш;
- 4.1.1.4. Сүлжээний орчинд хандах хандалтын (IPV4/V6, HTTP, HTTPS, FTP SFTP, RTSP, uPnP, P2P) протоколуудыг дэмжиж ажилладаг;
- 4.1.1.5. Хэрэглэгчийн нууц үг, сүлжээний (IP) хаягийн хязгаарлалт, HTTPS кодлолын хамгаалалттай;
- 4.1.1.6. Тоон буюу IP камер нь ONVIF, NEMA 4X, IK10 стандартыг хангасан байхаас гадна суурилуулах камер нь нэмэлтээр IP66 стандарт шаардлагыг хангасан;
- 4.1.1.7. Гадна орчинд ажиллах камер нь Монгол орны цаг уурын нөхцөлд тохирсон -40° хэмээс + 50° хэмд ажиллах шаардлагыг хангасан, ус чийг, тоосжилтоос хамгаалагдсан гадна зориулалтын камер байна.
- 4.1.1.8. Байгалийн гэрлийн орчинд тохирч ажиллах, өдөр шөнийн автомат тохируулга, үйл ажиллагаатай байна.
- 4.1.1.9. Орчны гэрэлтүүлгийн байдлаас хамаарч гэрлийн 0,0001-3,4 люкс (харанхуй) нэгжид хяналтын орчинг харах чадамж бүхий өөртөө болон нэмэлт гэрэлтүүлэгтэй байж болно.
- 4.1.1.10. Дүрсний хоцрогдолгүй 1-ээс илүүгүй секундэд боловсруулдаг байх.
- 4.1.1.11. Тоон буюу IP телекамерын тэжээлийг Power over Ethernet /PoE/ технологиор шийдэх тохиолдолд дотор телекамер нь IEEE 802.3af, гадна телекамер нь IEEE 802.3at тэжээлийн стандартыг дэмждэг байна.
- 4.1.1.12. Хөдөлгөөнт камер нь хэвтээ тэнхлэгт тулахгүй 360°, босоо тэнхлэгт 180°-аас багагүй, дурангийн оптик таталт 36 дахин, тоон таталт 10 дахин, линз /4.7-94/, гэрэлтүүлэг /өнгөт 0.05 lux-д 30 IRE F1.6, хар цагаанд 0.01 lux-д 30 IRE F1.6/, өөрөөс гаргах IR гэрэлтүүлэгтэй хамгийн багадаа 150м түүнээс дээш байна.
- 4.1.2. Бичлэг хадгалах төхөөрөмж гэж камераас дүрсийг хүлээн авч боловсруулах, хадгалах, ашиглах нөхцөл бүрдүүлж буй програм, техник хангамж бүхий төхөөрөмжийг хэлэх бөгөөд дараах шаардлагуудыг хангасан байна.
- 4.1.2.1. Дүрс бичлэгийн төхөөрөмж нь бүх сувагтаа 3072x2048 25 фрейм/секундээс дээш чанартай дүрс бичлэг хийдэг байна.

- 4.1.2.2. Бичлэг хадгалах хугацаа: Мэс заслын болон дотоод үйл-ажиллагааны хяналтын камерын бичлэг хадгалах хугацаа нь 30 ба түүнээс дээш хоног хадгална.
- 4.1.2.3. Нийтийн эзэмшлийн хэсгүүдийн хяналтын камерын бичлэг хадгалах хугацаа нь 14 ба түүнээс дээш хоног хадгална.
- 4.1.2.4. Эрх бүхий байгууллага, аж ахуй нэгж, албан тушаалтан камерын хяналтын системийг ашиглах, шаардлагатай дүрс бичлэгийг MP4, MPEG, WMV өргөтгөлөөр хуулбарлан авах техникийн боломжийг хангасан байна.
- 4.2. Камер суурьлуулалт
- 4.2.1. Камер хяналтын төв гэж дэлгэцийн тусламжтайгаар камерын дүрст мэдээллийг ашиглах, техникийн хэвийн ажиллагааг хянах өрөөг хэлнэ.
- 4.2.1.1. Хяналтын цэгт суурилуулсан камеруудыг нууцлал, аюулгүй байдлын үүднээс дараах 3 хэсэгт хуваан хянана. Үүнд:
- 4.2.1.2. Нийтийн эзэмшлийн хэсэг буюу нууцлалын дунд зэрэгтэй
- 4.2.1.3. Гадна талбай буюу нууцлалын дунд зэрэгтэй
- 4.2.1.4. Мэс заслын хэсэг, дотоод хяналтын буюу нууцлалын өндөр зэрэгтэй
- 4.2.2. Камер хяналтын цэг гэж хяналтын орчинг харах зорилгоор байрлуулсан камерын байршлыг хэлнэ.
- 4.2.2.1. Гадна камер болон дагалдах тоног төхөөрөмжүүд нь стандартын дагуу тусгай шон, төхөөрөмжийн хайрцагт суурилагдсан бөгөөд хяналтын орчноос хамааран барилгын дээвэр, хананд суурилуулж болно. Камерыг 3 метрээс доошгүй, хөдөлгөөнт телекамерыг 6 метрээс доошгүй өндөрт, төхөөрөмжийн аюулгүй байдал хангагдсан хэсэгт суурилуулна.
- 4.2.2.2. Гадна орчинд татах холболтын кабелийг зориулалтын далдлагч хоолойгоор хамгаалж, 50см тутамд бэхэлнэ. Энэ үед кабелийн өнгө үзэмжийг анхаарч бэхэлгээг хийх шаардлагатай. Бэхэлгээ хийхэд хамгаалалтын хоолойг хавчих, дарах зориулалттай тогтоогчийг ашиглана.
- 4.2.2.3. Гэрэлтүүлэг байхгүй орчинд нэмэлт гэрэл суурилуулж орчны харагдах байдлыг сайжруулна.
- 4.2.2.4. Дотоод хяналтын телекамерыг байгууламжийн дотор хана болон таазанд хяналтын орчин саадгүй үзэгдэх байрлалд камерын утас ил харагдахааргүй цэвэрхэн суурилуулна.
- 4.2.2.5. Барилга байгууламж дотор холболтын кабель суурилуулахдаа зориулалтын далдлагч ашиглах бөгөөд кабелийн тоо хэмжээнээс хамаарч далдлагчийн хэмжээ, багтаамжийг сонгоно.
- 4.2.2.6. Тусгай зориулалтын камерыг ашиглах зорилго, хяналтын орчны онцлог дээр үндэслэн хамгийн оновчтойгоор сонгож байрлуулна.
- 4.2.2.7. Телекамерын хяналтын системийн кабелийг өндөр хүчдэлийн (380В) цахилгааны шугамтай зэрэгцүүлж татахыг хориглоно.
- 4.2.2.8. Гадна хийгдэх угсралт, суурилуулалтын ажлыг -10° С хэмээс хүйтэнд гүйцэтгэхийг хориглоно.
- 4.2.2.9. Хяналтын камер нь үл тасалдах тэжээлийн төхөөрөмж болон сүлжээний найдвартай эх үүсгэврээр холбосон байх ба хяналтын төвтэй холбогдоно.
- 4.2.2.10. Мэс засал, дотоод хяналтын камер болон бусад шаардлагатай хэсгүүдэд дуу бичих боломжтой камерыг суурьлуулан ашиглаж болно.
- 4.3. Хяналтын төхөөрөмжүүдийн аюулгүй байдал
- 4.3.1. Систем, мэдээллийн сүлжээнд хандах эрхгүй халдагчаас хамгаалсан биет болон цахим хамгаалалтын зохицуулалттай байна.
- 4.3.2. Хяналтын цэг дэх мэдээллийн сүлжээ, цахилгаан тэжээлийн болон бусад төхөөрөмжүүдийг зориулалтын хайрцагт (ус чийг, тоос, цахилгаан гүйдэл, механик гэмтлээс хамгаалагдсан) байрлуулна

- 4.3.3. Төхөөрөмжийн үндсэн тохиргооны хэрэглэгчийн нууц үгийг өөрчилсөн байх. Төхөөрөмжийн холболтууд нэмэлт хэрэглэгчийн эрх ашиглан холбогдсон байна.
- 4.3.4. Телекамерын хяналтын системийн мэдээллийн сүлжээний холболт нь бие даасан, найдвартай, тасалдалгүй байдлыг дээд зэргээр хангасан байна.
- 4.3.5. Мэдээллийн сүлжээ, тэжээлийн кабель болон бусад холболтын кабелийн 2 талыг хаягжуулсан байна.
- 4.3.6. Камерын хяналтын системийн мэдээллийн сүлжээний монтаж, тэжээлийн холболтын бүдүүвч зурагтай байна.
- 4.3.7. Бичигч төхөөрөмж нь үл тасалдах тэжээлийн төхөөрөмж (UPS)-тэй байна.
- 4.3.8. Камерын байршлын суурь эд анги, камер найдвартай аюулгүй, хүний гар хүрэх боломжгүй байхаар байрласан байна.
- 4.3.9. Дэлгэцийг гадны хүнд харагдахааргүй байрлалд байршуулна.
- 4.3.10. Нэвтрэх эрх, нууц зэргийг дахин давтагдашгүй /хамгийн багадаа нэг тоо, нэг жижиг үсэг, нэг том үсэг, тэмдэгт цифр/ байхаар зохицуулна.
- 4.3.11. Хяналтын системийн хамгаалалтын нууц үгийг улирал тутамд шинэчлэнэ.
- 4.3.12. Аюулгүй байдлын зааварчилгааг мөрдөн ажиллаж бүртгэл хөтөлнө. /зөв асааж, унтраах, бичлэг үзэх хуулах заавар өгөх, нууцлалын биелэлт гэх мэт/
- 4.3.13. Нийтийн эзэмшлийн камеруудын хяналтыг эмнэлгийн захирлын зөвшөөрснөөс камер хяналтын төвөөс салаалан нийтээр болон хэсэгчилэн харах байдлаар зохион байгуулж болно.

ТАВ. ЭМНЭЛГИЙН ТУСЛАМЖ ҮЙЛЧИЛГЭЭНИЙ ДОТООД ХЯНАЛТЫН КАМЕРЫН ҮЙЛ АЖИЛЛАГАА

- 5.1. Хувь хүний болон мэдээллийн аюулгүй байдлыг хангах, байгууллагын эд хөрөнгийг хамгаалахад хяналтын камерыг ашиглана.
- 5.2. Тус эмнэлгийн мэс заслын тусламж, үйлчилгээний аюулгүй байдлыг хангах, тусламж үйлчилгээг стандарт, удирдамжийн дагуу гүйцэтгэх үйл ажиллагааны явцад хяналт тавьж, мэс заслын багаар ажиллах чадварыг нэмэгдүүлэх, багийн сахилга, хариуцлагыг өндөржүүлэхэд чиглэгдэх бөгөөд үйлчлүүлэгчид танилцуулж, зөвшөөрөл авсны үндсэн дээр бичлэг хийнэ.
- 5.3. Мэс заслын өрөөны камерын бичлэг нь нууцын өндөр зэрэглэлд орох бөгөөд Эмнэлгийн тусламж үйлчилгээ хариуцсан дэд захирал / ЭТҮХДэд Захирал / камерын хяналтын бичлэгээр мэс заслын явц, багийн гишүүдийн бүрэлдэхүүн, гүйцэтгэж буй үйл ажиллагааны дараалал, гаргаж буй оновчтой шийдвэр, мэс заслын талаархи онцлог мэдээлэл, аюулгүй ажиллагаа, дотоод хяналтын талаар тодруулан танилцаж, тухай бүр нь хяналт тавьж ажиллана.
- 5.4. Эмнэлгийн гадна, дотно нийтийн эзэмшлийн талбайн камерын бичлэг нь нууцын зэрэглэлд орох бөгөөд тасгийн эрхлэгч, албадын дарга нар нь тусламж үйлчилгээний чанар, хүртээмж, аюулгүй ажиллагаатай танилцаж, камерын хэвийн үйл ажиллагаанд хяналт тавьж ажиллана.
- 5.5. Камерын бичлэгтэй мэдээлэл технологийн алба нь Ерөнхий захирлын зөвшөөрлөөр бичлэгтэй танилцах эрх бүхий албан тушаалтанд танилцуулна.
- 5.6. Камерын хяналтын бичлэгийг эргэн үзэж танилцсан болон сургалт, судалгаанд ашиглах тохиолдолд тусгай асуумж бүхий бүртгэлийг хөтлөн байгууллагын архивд хадгалуулна.
- 5.7. Бичлэг хадгалах төхөөрөмж нь техникийн нөхцөл боломжоос хамааран эрсдэл бүхий байршилд суурьлуулагдсан бол аюулгүй байдлыг хангасан цоож бүхий тусгай зориулалтын хайрцагт байршуулан аюулгүй байдлыг МТА хариуцан ажиллана.

- 5.8. Үйлчлүүлэгч, эмч, эмнэлгийн мэргэжилтний үйл ажиллагаатай холбоотой камерын хяналтын шууд бичлэг болон архивын материалын нууцлал аюулгүй байдлыг холбогдох эмч, мэргэжилтнүүд чандлан нууцална.
- 5.9. Мэс засал, Амбулаторын тасгийн камерын бичлэгийг сургалтын зориулалтаар ашиглах тохиолдолд үйлчлүүлэгчээс зөвшөөрөл авах ба хүнийг тодорхойлох боломжгүй болгоно.

ЗУРГАА. ЭРХИЙН ТҮВШИН БА ТЭМДЭГЛЭЛ ХӨТЛӨХ ҮЙЛ АЖИЛЛАГАА

- 6.1. Эмнэлгийн хэмжээний камер болон бичигч төхөөрөмжийн бүртгэл, засвар үйлчилгээний тэмдэглэлийг тухай бүр 2 дугаар хавсралтын хүснэгт №1,2, техник үзлэгийн маягтыг 7 хоног бүр МТА-ны инженер цахим хэлбэрээр 2 дугаар хавсралтын хүснэгт №3 маягтын дагуу тус тус хөтөлнө.
- 6.2. Мэс засал, тусламж үйлчилгээний камерын бичлэг, Эмнэлгийн захирал түүний эзгүйд Эмнэлгийн тусламж үйлчилгээ харицсан дэд захирал, Эрдэм шинжилгээ иноваци хариуцсан дэд захирал-ын зөвшөөрлөөр МТА-ны инженер шүүж өгөх бөгөөд 2 дугаар хавсралтын хүснэгт №5 маягтын дагуу тэмдэглэл хөтлөн шаардлагатай бол хуулбарлаж өгнө.
- 6.3. Нийтийн эзэмшлийн камерын бичлэгийг Чанар, аюулгүй байдлын алба болон Мэдээлэл технологийн албаны дарга нарын зөвшөөрлөөр МТА-ны инженер, тасгийн эрхлэгч, албадын дарга нар нь /Хувь хүн бол бичиг баримт, өргөдөл Албан байгууллага бол албан тоот/ бичгийн дагуу хоёрдугаар хавсралтын хүснэгт №5 маягтын дагуу тухай бүр бүртгэл хөтлөн гарын үсгээр баталгаажуулан хяналтын камерыг шүүж өгөх бөгөөд шаардлагатай тохиолдолд хуулбарлан өгч болно.
- 6.4. Гадна хэсгийн камерын бичлэгийг Чанар, аюулгүй байдлын алба болон Мэдээлэл технологийн албаны дарга нарын зөвшөөрлөөр МТА-ны инженер нь /Хувь хүн бол бичиг баримт, өргөдөл Албан байгууллага бол албан тоот/ үндэслэн 2 дугаар хавсралтын хүснэгт №4 маягтын дагуу тухай бүр бүртгэл хөтлөн гарын үсгээр баталгаажуулан хяналтын камерыг шүүж өгөх бөгөөд шаардлагатай бол бичлэгийг хуулбарлан өгч болно.
- 6.5. Дээр дурдсан удирдах албан тушаалтан болон холбогдох албадаас бусад ажилтнуудад хяналт хийх болон бичлэг шүүх, хуулах эрх олгохыг хориглоно. Онцгой тохиолдолд эмнэлгийн захирлын зөвшөөрлөөр хязгаарлагдмал эрх олгох байдлаар зохицуулна.

ДОЛОО. ХАРИУЦЛАГА

- 7.1. Энэхүү журмын 6 дугаар бүлэгт заасан камеруудын бичлэгийг эмнэлгийн тусламж үйлчилгээний чанар, тусламж үйлчилгээний дотоод үйл ажиллагааг сайжруулах болон сургалтын зорилгоор ашиглахаас бусад байдлаар ашиглахыг хатуу хориглоно.
- 7.2. Камерын бичлэгийг журамд заагдсанаас бусад зорилгоор авч ашигласан, эрх бүхий албан тушаалтнаас зөвшөөрөл авалгүй бичлэг шүүж өгсөн тохиолдолд тухайн ажилтныг Эмнэлгийн Ёс зүйн салбар хороогоор хэлэлцэн шийдвэрлэж хариуцлага хүлээлгэнэ.
- 7.3. Мэс засал, тусламж үйлчилгээний дотоод хяналтын камерын бичлэг дээр чанар болон ёс зүйн доголдол гаргасан нь нотлогдсон тохиолдолд тухайн эмч, эмнэлгийн ажилтнуудад холбогдох хууль тогтоомжийн дагуу тус тус хариуцлага хүлээлгэнэ.
- 7.4. Энэхүү журмыг зөрчсөн эмч, эмнэлгийн ажилтнуудад зохих журмын дагуу хариуцлага хүлээлгэнэ.



4. НИЙТИЙН ЭЗЭМШЛИЙН ХЭСГҮҮДИЙН КАМЕР ШҮҮСЭН ТУХАЙ ТЭМДЭГЛЭЛ

№	IP	Бүртгэл, байршил	Огноо	Шалтгаан	Бичлэг		Шүүлгэсэн			Шүүж өгсөн Гарын үсэг	Зөвшөөрөл, авсан эсэх
					Хугацаа	Хуулсан эсэх	Регистр Овог нэр	Утас	Гарын үсэг		
1											
2											
3											

5. МЭС ЗАСАЛ, ТУСЛАМЖ ҮЙЛЧИЛГЭЭНИЙ ДОТООД ХЯНАЛТЫН ХЭСГҮҮДИЙН КАМЕР ШҮҮСЭН ТУХАЙ ТЭМДЭГЛЭЛ

№	IP	Бүртгэл, байршил	Огноо	Шалтгаан	Бичлэг		Шүүлгэсэн			Шүүж өгсөн Гарын үсэг	Зөвшөөрөл, авсан эсэх
					Хугацаа	Хуулсан эсэх	Регистр Овог нэр	Утас	Гарын үсэг		
1											
2											
3											